



23. januar 2015

UPA 2015/122

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut kingu-sinnerpaamik UPA2016-imi Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersorneq pillugu inatsimmi aatsitassarsiornermit isertitanut paasinninnermit immikkoortinneqassasoq. Allanguinermit tigussaasumik atortut, soorlu oliamik maqisuunnginnissamut atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqanginnissaat allanneqartariaqarpoq.

(Inatsisartunut ilaasorta, Naaja Nathanielsen, Inuit Ataqatigiit)

Tunggavilersuut

2008-mili Inatsisartut aatsitassarsiornermi aningaasaateqarfimmik pilersitsinissaq akuersissutigivaat. Aningaasaateqarfik ukiumi ataatsimi isertitat 5 millionit qaangerpagit pilersinneqartussaavoq. Aningaasaateqarfik pilersinneqareerpat aatsitassarsiornermit isertitat tamakkerlutik tassunga ikineqassapput. Taamaattumik aatsitassarsiornermi suut isertitatut isigineqassanersut inatsimmi nassuiarneqarsimapput.

Ullumikkut Namminersorneq pillugu inatsimmi Aatsitassarsiornermilu aningaasaateqarfimmut inatsimmi aatsitassarsiornermit isertitanut paasinninneq assigiippoq taamaattumillu ajornartorsiutitaqarsinnaalluni.

Namminersorneq pillugu inatsimmi aatsitassarsiornermit isertitanut paasinninneq Danmarkilu naalakkersuinikkut isumaqatigiissuteqarsimanermik tunggaveqarpoq. Aatsitassarsiornermili aningaasaateqarfiup aatsitassarsiornermit isertitanut nassuiaatai Inatsisartunit taamaallaat aalajangerneqartussaapput. Inatsisit taakkua marluk immikkoorput.

Namminersorneq pillugu inatsit aamma Aatsitassarsiornermi aningaasaateqarfimmut inatsit naapertorlugit aatsitassarsiornermit isertitat tassaapput nunami ingerlassat tigussaasut aqqutigalugit isertinneqartut. Tassunga assersuutissaavoq oliamik maqisuunnginnissamut atortoq, isumaqatigiissut IBA naapertorlugu Cairnip pisussaaffilerneqarnini naapertorlugu nunatsinnukaassaa.

Atortut nalitoorujussuupput, Namminersorneq pillugu aamma Aatsitassarsiornermi aningaasaateqarfimmut inatsisit naapertorlugit isertitatut naatsorsuussaallutik. Atortut 5

millioner kronit sinnerlugit naleqarmata tamanna Aatsitassarsiornermi aningaasaateqarfiup aallartinneqarsinnaaneranik isumaqarpoq.

Isumaqaqqangilangali pisat tigussaasut, soorlu timersortarfiit imaluunniit oliamik maqisuunnginnissamut atortut, tunngavigalugit aatsitassarsiornermi aningaasaateqarfiup aallartinneqarnissaa taamanikkut inatsisiliortut siunertarisimassagaat.

Taakkuami aningaasanik immi isertitsiviunngillat aningaasaliissutitullu atorneqarsinnaanatik. Tamatuma saniatigut atortut tigussaasut nutaatut naleqarajuttarput piffissap ingerlanerani iluarsaanneqartussaananermikkut atorneqarnermikkullu nalikilliarortartut.

Taamaattumik Kalaallit Nunaata Aatsitassarsiornermi aningaasaateqarfiani isertitanik paasinninnermik allannguuteqartitsinissamik, taamatullu atortut tigussaasut isertitatut naatsorsuunneqaqqanginnissaannik aalajangiinissamik siunnersuut siunertaqarpoq.

Pisortani aningaasatigut allaffissornikkullu kingunissai

Taamaallaat inatsip pioreersup iluarsineqarnissaa pineqarmat aammalu Naalakkersuisut oqariartaatsimut "aatsitassarsiornermit isertitanut" tunngatillugu erseqqissaanissamut atugassamik Lett advokatfirmamit naliliinermik pissarsereersimammata, Inuussutissarsiornermullu ataatsimiittaliaasimasup piniagaanik Deloitte-miit naliliinermik pissarsisoqareersimammat inatsisissamut siunnersuutip suliarineqarnissaanut aningaasartuutit killeqarnissaat nalilerneqarpoq.

Namminersortuni aningaasatigut allaffissornikkullu kingunissai

Piffissaq qaninnerusoq ungasinnerusorlu isigalugit soqaqqangilaq.

Innuttaasuni aningaasatigut allaffissornikkullu kingunissai

Soqaqqangilaq.